

# ՍԷՅԴԱԲԱԴԻ ՀԱՅՈՑ ԵԿԵՂԵՑԻՆ ԵՒ ՆՇԱՆԱԻՈՐ ՄԻ ՔԱՆԻ ԳԵՐԵԶՄԱՆՆԵՐԸ

ՏԻԳՐԱՆ ՄՐԿ. ԲԱՂՈՒՄԵԱՆ  
tigransrk@yahoo.com

Հնդկահայ գաղութի կեանքում իր ուրոյն դերն ու նշանակութիւնն է ունեցել Բենգալիա նահանգը<sup>1</sup>, ուր հայերը բնակուել են անդլիացիներից շատ առաջ՝ Ժ. դարասկզբին: Դրա ակնյայտ վկայութիւնը Կալկաթայի Ս. Նազարէթ հայկական եկեղեցու բակում գտնուող նահանգի ամենահին քրիստոնէական գերեզմանն է, որը 1884 Օգոստոսին յայտնաբերել է Հնդկահայ գաղութի քաջ գիտակ, հմուտ բանասէր Մեսրոպ Սէթը: Փաստօրէն, 1630ին իր մահկանացուն կնքած Ռզարիբէ հայուհու գերեզմանը ոչ միայն պատմական եւ մշակութային արժէք է հայերի համար, այլեւ իր նշանակութեամբ եւ արժէքով պատմակա-նութիւն է ձեռք բերել հենց Հնդկաստանի համար<sup>2</sup>:

Բենգալիան յատկապէս ծաղկում ապրեց Մուղալ<sup>3</sup> կայսրութեան կառավարիչների օրօք, երբ նպաստաւոր պայմաններ ստեղծուեցին միջազգային առեւտրի համար, որից էլ մեծապէս օգտուեցին եւրոպացի եւ հայ վաճառականները: Բենգալիայում առեւտրական լայն գործունէութիւն էին ծաւալում ժամանակի նշանաւոր հայ վաճառականներ Խոջա Փանոս Քալանթարը, նրա եղբորորդի Խոջա Իսրայէլ Սարհազը, Խոջա Վազէզը, Խոջա Պետրոսը եւ ուրիշներ, ովքեր իրենց հեղինակութեամբ եւ գործունէութեամբ վայելում էին Մուղալ կայսրերի բարեացակամ վերաբերմունքը: Նրանց շնորհիւ ծաղկում էր ապրում ջութի, մետաքսի, պարարտանիւթի եւ այլ ապրանքների առեւտուրն ամբողջ Հնդկաստանում: Մուղալ կայսրութեան կառավարիչների, 1688ին Խոջա Փանոս Քալանթարի եւ Անգլիական Արեւելահնդկական Ընկերութեան միջեւ կնքուած պայմանագրի շնորհիւ հայերն ունէին բոլոր ազատութիւնները եւ իրաւունքները<sup>4</sup>: Շատ անգամ հենց հայերն էին դառնում միջնորդ կայսրութեան եւ օտար առեւտրականների միջեւ՝ լուծելով զանազան եւ երբեմն էլ անհնարին թուացող խնդիրներ<sup>5</sup>: Խելացի եւ հմուտ վերոնշեալ վաճառականների, նահանգում ունեցած նրանց դիրքի եւ ամենակարեւորը՝ տեղի կառավարիչների լաւ վերաբերմունքի շնորհիւ նպաստաւոր պայմաններ էին ստեղծուած հայերի բնակութեան եւ բազմանալու համար:

Ի դէմս հայերի՝ նահանգի կառավարիչները տեսնում էին աշխատասէր, դիմացիներն յարգող, գործունեայ եւ հիւրասէր մարդկանց, ովքեր ոչ միայն մտածում էին իրենց անձնական շահոյթի մասին, այլ նաեւ խրոփսանն օգտակար լինում հենց Հնդկաստանին:

Հայերը բնակուում էին Բենգալիայի Սէյդաբադ, Կալկաթա, Չինսուրա, Դաքքա, Պատնա, Կասիմբազար եւ այլ քաղաքներում:

Այսօր հայաբնակ է միայն Կալկաթան, ուր ապրում են շուրջ 150 հայեր: Զանազան պատճառներով նրանց մեծ մասը չեն խօսում հայերէն եւ կտրուած են իրենց ազգային արմատներից: Վերջին տարիներին, սակայն, որոշակի աշխուժութիւն է նկատուում, երբ Հայոց Մարդասիրական Ծեմարանը յանձնուեց Մայր Աթոռ Սուրբ Էջմիածնի տնօրինութեանը<sup>6</sup>, եւ Կալկաթայի եկեղեցական

վարչութեան ջանքերով նորոգուեցին հայկական եկեղեցիները, բարեկարգուեցին յարակից տարածքները, ուշադրութիւն դարձուեց նաեւ հայերի սոցիալ-տնտեսական պայմաններին<sup>7</sup>։

Սկզբում հայերը Բենգալիայում պաշտօնապէս հաստատուել են Մուրշի-դարադի<sup>8</sup> մատոյցներում գտնուող Սէյդարադ քաղաքում, որն այն ժամանակ Բենգալիայի մայրաքաղաքն էր։ Մասնաւորապէս ժամանակի Աուրանգզէր (1658-1707) կայսրն<sup>9</sup> իր ֆարմանով 1665ին Սէյդարադում հող է նուիրում հայերին՝ թոյլատրելով բնակութիւն հաստատել այնտեղ<sup>10</sup>։ Հայերին տրուած արտօնութեան մասին է վկայում նաեւ ԺԼ- դարում Հնդկաստանի Արեւելեան Ընկերութեան աշխատակից Բոյցը՝ մասնաւորապէս բնդգծելով. «Հայերը, ովքեր մեծ առեւտրական գործօն են Հնդկաստանում, վաղ ժամանակներից մնայուն գաղութներ են ունեցել նաեւ Բենգալիայում, մասնաւորապէս Սէյդարադում։ Նրանց վաճառականութիւնն էլ հաստատուած էր մուղալական ֆարմանով, որով իրենց երկու գլխաւոր ապրանքների՝ մանուֆակտուրայի եւ հում մետաքսի վրայ 3.5 տոկոս հաստատագրուած հարկ էր դրուած»<sup>11</sup>։

Աուրանգզէրի կողմից հայերին հող նուիրաբերելն իրօք ուշագրաւ փաստ է։ Հայերի նկատմամբ նման շռայլութիւնն ու վերաբերմունքը պայմանաւորուած էր հաւանաբար մի շարք հանգամանքներով՝ Հնդկաստանի պատմութեան մէջ ունենալով նաեւ իր նախադէպը։

Նախ՝ մինչ այդ հայերն արդէն իսկ իրենց հաստատուն դիրքն ունէին շրջապատում եւ վայելում էին տեղացիների վստահութիւնն ու յարգանքը։ Տեղին է յիշատակել հայերի նկատմամբ Աուրանգզէրի նախորդներից՝ Աքբարի (1556-1605) վարած իմաստուն եւ հեռատես քաղաքականութեան մասին։ Վերջինս, ցանկանալով երկրում զարգացնել արհեստագործութիւնը եւ խթանել առեւտուրը, իր թագաւորութեան սահմաններում ազատ երումուտքի իրաւունք է տալիս հայ վաճառականներին։ Հայ առեւտրականներն առանց մաքսի կարող էին ցանկացած ապրանք ներմուծել եւ արտահանել, մտնել եւ առեւտրով զբաղուել երկրի այնպիսի շրջաններում, ուր օտարների մուտքն արգելուած էր։ Աքբարը Ազրայում նաեւ հողատարածք է յատկացրել հայերին եւ նպաստաւոր պայմաններ ստեղծել նրանց գործունէութեան համար։

Ոչ-պակաս էական է նաեւ այն փաստը, որ Աքբարի օրօք հնդկահայերը նաեւ պետական կարեւոր պաշտօններ են զբաղեցրել։ Օրինակ՝ ազգութեամբ հայ էին երկրի գլխաւոր դատաւոր Միր Ադըլը կամ Աբդուլ Հայը, պալատական բժշկուհի Յուլիանան, պորտուգալերէնի թարգմանիչ Դոմինգօ Պիրէսը։ Ազգութեամբ հայ էին նաեւ այլ պետական պաշտօնեաներ։ Եւ վերջապէս հայուհի էր հենց թագաւորի կանանցից մեկը՝ Մարիամ Զամանի Բեգումը։ Հետաքրքրական փաստ է նաեւ, որ Աքբարը, սկզբում զաւակ չունենալով, որդեգրել էր ջուղայեցի Յակոբջանի որդուն՝ Ղուլդունէյին<sup>12</sup>։ Ինքնին այս փաստերը խօսուն վկայութիւն են տուեալ ժամանակաշրջանում հայերի նպաստաւոր դիրքի եւ երկրում ունեցած նրանց նշանակալի դերակատարութեան մասին, նաեւ՝ լաւագոյն նախադէպեր Աուրանգզէրի համար։ Ուստի չպէտք է զարմանալ հայերի նկատմամբ նրա վարած քաղաքականութեան վրայ<sup>13</sup>։ Կարելի է ենթադրել նաեւ, որ Աուրանգզէրը շատ լաւ ծանօթ էր հայերի աշխատասիրութեանը, տեղանքը շէնացնելու եւ բարեզարդելու նրանց շնորհքին եւն-, ուստի

առանց երկմտելու էլ հայերին է նուիրաբերում այդ հողակտորը՝ վստահ լինելով, որ նրանք անպայման ծաղկեցնելու են այդ տարածքը:

Յեռագայ պատմութիւնը լաւագոյնս պայցուցում է, որ առաջին հնդկահայերը ոչ միայն հայկական եկեղեցի են կառուցում այնտեղ, այլ նաեւ բարեկարգում եւ շէնացնում են տարածքը: Անդամ ալսօր Սէյդարաղում, ուր այլեւս հայեր չկան, երբ այցելում ես հայկական եկեղեցի, ակամայից բախում ես նոյն իրողութեան հետ: Կալկաթայից մեքենայով 5-6 ժամ հեռաւորութեան վրայ գտնուող այդ քաղաքը գնալիս ճանապարհին ամէնուր հանդիպում ես խարխուլ տների, չքաւոր մարդկանց: Բայց երբ մօտենում ես եւ տեսնում հայոց եկեղեցու տարածքը, իրապէս զարմանք ես ապրում, քանզի կայսեր կողմից ժէ. դարում նուիրաբերուած այդ տարածքը կրկին խնամուած վիճակում է, պարսպապատ, բարեկարգուած, իսկ եկեղեցուն պատկանող լիճը՝ մաքուր:

\*\*\*

Հայերը Սէյդարաղում հիմնականում գրաղւում էին կտորի եւ հում մետաքսի առեւտրով: ԺԸ. դարի կէսերին արդէն բազում հայեր էին այնտեղ ապրում, որի ակնյայտ վկայութիւնը Սուրբ Աստուածածին հայկական եկեղեցու կառուցումն է 1758ին՝ Կալկաթայի ժամանակի հայ համայնքի ղեկավար, ջուղայեցի նշանաւոր վաճառական, բարեգործ Խոջա Պետրոսի († 1778)<sup>14</sup> անձնական միջոցներով՝ ի յիշատակ իր հանգուցեալ ծնողներ Յարութիւնի եւ Ովսաննայի եւ իր հարազատների: Յաւօք, վերջին տարիներին Կալկաթայի եկեղեցական վարչութեան ջանքերով Սէյդարաղի եկեղեցում կատարուած շինարարական-վերականգնողական աշխատանքների պատճառով եկեղեցուց անհետացել է հիմնադրման մասին արձանագրութիւնը:

Բարեբախտաբար այն պահպանուել է Հնդկաստանի եւ Մայրագոյն Արեւելքի Հայրապետական պատուիրակ Տ. Հայկազուն Արք. Աբրահամեանի՝ Մայր Աթոռ Սուրբ Էջմիածնի Զեռագրատանը պահուող անտիպ օրագրում: Սրբազան Հայրը, 1965 Յունուարի 31ին այցելելով Սէյդարաղ, շարադրում է օրուայ մասին իր տպաւորութիւնները: Իր արժէքաւոր օրագրութեան մէջ նա մէջբերում է նաեւ եկեղեցու կառուցման արձանագրութիւնը. «Շինեցաւ պայծառափայլ Սուրբ Աստուածածնի եկեղեցիս հանդերձ երկրին գալօքն իւրովք եւ չորեքկողմեան պարսպօքն եւ սենեկօք յամի Տեառն 1758 Արամ 15 (Դեկտեմբերի 30ին - Տ.Բ.), արդեամբք եւ ծախիք Խօջարաբեան (Հաւանաբար պիտի լինի՝ Խօջա Աբրահամեան - Տ.Բ.) ամենաբարեպաշտ եւ Քրիստոսի գօրացեալ ՊԵՏՐՈՍ աղային, որ եւ է տունս տէրունեան, յիշատակ բարեաց իւրն յիշել Պետրոս աղային եւ լուսահոգի ծնօղացն՝ հօրն Յարութիւնին եւ մօրն Ովսաննային եւ կողակցին Դաստագուլին եւ եղբարցն Գրիգոր աղային եւ պարոն Բարսեղին եւ այլ ամենայն արեանս առու մերձատրացն նորին, կենդանեացն եւ առ ի Քրիստոս հանգուցելոցն: Գրեցաւ ի փոքր թուին Ագարիայի 145 (1760), համիրայ ամսոյ 15 (Նոյեմբերի 30ին - Տ.Բ.): Է սա տաճար տէրունեան, հրեշտակաց քնակարան եւ մարդկան քաւարան: Վերջ»<sup>15</sup>:

Խօջա Պետրոսի ջանքերի շնորհիւ 1763ին բարեկարգուել է նաեւ 1707ին հիմնադրուած Կալկաթայի Ս. Նազարէթ հայկական եկեղեցին. աւելացուել են մայր խորանի աջ եւ ձախ կողմերում գտնուող խորանները: Ս. Գրիգոր Լուսա-

ւորչին նուիրուած խորանը նա կառուցել է ի յիշատակ իր եղբայր Գրիգոր Յարութիւնեանի<sup>16</sup>, իսկ միւսը նուիրաբերել Քրիստոսի երկու անխոնջ աշակերտներին՝ Ս. Պետրոսին եւ Ս. Պօղոսին՝ ի յիշատակ իրեն: Այդ մասին են վկայում եկեղեցում արուած արձանագրութիւնները<sup>17</sup>:

ԺԸ. դարի վերջում եւ ժԹ. դարի սկզբում, երբ Սէյդաբազը դադարում է առեւտրական կենտրոն լինելուց, հայերն սկսում են լքել այն՝ բնակութիւն հաստատելով Հնդկաստանի այլ վայրերում: Ըստ Մեսրոպ Սէթի՝ 1860ից յետոյ 75 տարիներ շարունակ Սէյդաբազի հայկական եկեղեցում կրօնական արարողութիւն չի կատարուել: Վերոգրեալ թուականից մինչեւ Առաջին Համաշխարհային Պատերազմն էլ եկեղեցին մեծապէս տուժել է երկրաշարժերի, ջրհեղեղների եւ հրդեհների պատճառով: Միայն մասնակի վերանորոգութիւններ են կատարուել անցած դարի տարբեր ժամանակներում:

Եկեղեցու համար բախտորոշ էին յատկապէս Ի. դարի 50ականները: Մասնաւորապէս Կալկաթայի հոգեւոր հովիւ Տ. Արամայիս Քհնյ. Միրզայեանը 1954ին երկու անգամ այցելում է Սէյդաբազ, մօտիկից ծանօթանում եկեղեցու վիճակին եւ իր մտահոգութիւնների մասին տեղեկացնում Կալկաթայի եկեղեցական վարչութեան անդամներին: Նոյն եկեղեցականի նախաձեռնութեամբ մեծ ուխտագնացութիւն է կատարուում Սէյդաբազի հայոց եկեղեցին 1962ին: Կալկաթահայ համայնքի 53 անդամներ մասնակցում են Սուրբ Պատարագին եւ հաղորդութիւն ստանում: Նոյն տարում Սէյդաբազ է այցելում նաեւ Հայրապետական Պատուիրակ Տ. Ասողիկ Եպս. Ղազարեանը: Այս այցելութիւնների արդիւնքում եկեղեցին վերանորոգւում եւ բարեկարգւում է: 1963 Յունուարի 26ին՝ Հնդկաստանի Հանրապետութեան Օրը, Տ. Պօղոս Քհնյ. Պետրոսեանի ձեռամբ կատարում է եկեղեցու վերաբացման արարողութիւնը: Դրանից յետոյ աւանդութիւն է դառնում Հնդկահայ համայնքում ամէն տարի Յունուար ամսին ուխտի գնալ Սէյդաբազ:

Ի. դարի 60-70ականներին, ժամանակի հոգեւոր առաջնորդների նախաձեռնութեամբ ամէն տարի Մարդասիրական Ճեմարանի մի խումբ սաներ ուխտի են մեկնել երբեմնի հայաշատ այս բնակավայրը, ուր մատուցուել է Սուրբ Պատարագ եւ կրկին աղօթք հնչել: Եկեղեցու վերջին խնամակալներն են եղել Մատթէոս եւ Մերի Կարապետեանները, ովքեր նախանձախնդրութեամբ եւ ամենայն փութաջանութեամբ շուրջ կէս դար՝ մինչեւ 1968, խնամել են եկեղեցին եւ նրան յարող տարածքը՝ հայաշունչ ոգով լցնելով Տիրամօրը նուիրուած աղօթատուներ:

Սէյդաբազում մինչեւ այսօր էլ տարեցները մեծ ոգեւորութեամբ եւ երախտագիտութեամբ են յիշում Մատթէոս Կարապետեանին՝ նրա մասին զարմանահրաշ դէպքեր պատմելով, թէ՛ Աստուած երազում յայտնւում է Մատթէոսին եւ պատուիրում, որ թողնի իր ընտանիքը, զաւակներին եւ մեկնի Հընդկաստան՝ դառնալով հայազուրկ Սէյդաբազի Սուրբ Աստուածածին եկեղեցու խնամակալը: Զիմանալով անգամ նման եկեղեցու գոյութեան մասին, բայց անսալով Տիրոջ հրամանին՝ նա թողնում է ամէն ինչ, Պարսկաստանից Հընդկաստան գալիս եւ ստանձնում եկեղեցու խնամակալութիւնը: Այստեղ նա ամուսնանում է ազգութեամբ Հնդիկ Մերիի հետ եւ 20 զաւակ ունենում: Նա օժտուած է եղել անասելի եւ տիտանական ուժով: Ըստ տեղացիների՝ երկար

ժամանակ գիւղին մեծ դժուարութիւններ պատճառող մի վագրի հետ մարտի բռնուելով, երկու կէս է անում նրան քաջ Մատթէոսը<sup>18</sup> :

Սէյդաբաղի Ս. Աստուածածին եկեղեցին վերագարթօնք ապրեց ԻԱ. դարասկզբին: 2005-2006ին Կալկաթայի եկեղեցական նորընտիր վարչութիւնը ձեռնամուխ եղաւ Սէյդաբաղի հայկական եկեղեցու վերանորոգման աշխատանքներին: Եկեղեցին այժմ ունի զուտ հայկական նոր զանգակատուն եւ նոր հիւրատուն: Հայ համայնքին են վերադարձուել նաեւ տեղացիների կողմից նախկինում ապօրինաբար զաւթուած յարակից տարածքները:

2006 Դեկտեմբերի 5ին Հնդկահայոց Հոգեւոր Հովիւ Տ. Օշական Վրդ. Գիւլգիւլեանի եւ Մայր Աթոռ Ս. Էջմիածնի միաբան Տիգրան Արկ. Բաղումեանի մասնակցութեամբ կատարուել է վերանորոգուած եկեղեցու դռնբացէքի արարողութիւնը, իսկ 2007 Մարտի 4ին, Հնդկաստանի եւ Մայրագոյն Արեւելքի Հայրապետական Պատիրակ Տ. Աղան Առք. Պալիողեանի ձեռամբ օծուել են Ս. Աստուածածին վերանորոգուած եկեղեցու Սուրբ Սեղանը եւ սիւների 16 խաչերը<sup>19</sup> :

\*\*\*

Հնդկաստանի հայ առաքելական միւս եկեղեցիների նման Սէյդաբաղի Ս. Աստուածածին եկեղեցու բակում են հանգչում բազում հայորդիներ, ովքեր իրենց վերջնական հանգիստն են գտել երբեմնի հայաշունչ այս քաղաքում: Այժմ պահպանուել է շուրջ 80 գերեզման: Դրանց մի մասի արձանագրութիւններն անընթեռնելի են. կան նաեւ մի քանի գերեզմանաքարեր, որոնց վրայից ընդհանրապէս ջնջուել են արձանագրութիւնները: Ցայսօր պահպանուած ամենահին գերեզմանը Մկրտիչ անունով ոմն հայի է, ով մահացել է 1760ին: Վերջինիս տապանաքարը բոլոր կողմերից ջարդուած է, իսկ վրայի արձանագրութիւնը՝ դժուարընթեռնելի: Ժամանակագրական առումով նրան յաջորդում են եւս երկու գերեզմաններ: Առաջինը «Մօսեսի կողակից ազնի տիկին Մարիամ խանուանին» է, ով մահացել է 1765ին եւ թաղուել եկեղեցու բակում: Նոյն տարում է իր մահկանացուն կնքել նաեւ Նիկողայոս քահանայի որդի Պետրոսը:

Այսօր դժուար է ասել, թէ ժամանակին քանի գերեզման է եղել Սէյդաբաղի եկեղեցու մերձակայքում, քանզի այս առումով տեղեկութիւնները հակասական են: Թորգոմ Գուշակեան Պատրիարքը, 1917 Մարտի 2ին այցելելով Սէյդաբաղ, խօսում է շուրջ 110 գերեզմանի մասին<sup>20</sup> : Ցաւօք, նա չի անդրադառնում գերեզմանների վիճակին:

1954 Նոյեմբերի 20ին Տ. Արամայիս Քէչնյ. Միրզայեանի առաջնորդութեամբ մի խումբ հայեր այցելում են Սէյդաբաղ: Կալկաթայի եկեղեցական վարչութեանը հասցէագրած իրենց նամակում նրանք նշում են եկեղեցու եւ տարածքի անմխիթար վիճակի մասին: Անդրադառնալով գերեզմաններին՝ նամակագիրները տխրութեամբ արձանագրում են, որ գերեզմանների մեծ մասի վրայից անհետացել են գերեզմանաքարերը, շատերի վրայից հնարաւոր չէ ընթերցել արձանագրութիւնները<sup>21</sup> :

2006 Դեկտեմբերի 5ին՝ Սէյդաբաղի վերանորոգուած եկեղեցու բացման արարողութեան ժամանակ առիթն ունեցանք ծանօթանալու եկեղեցու վերջին խնամակալներ՝ Կարապետեան ամուլի թոռնուհի Հելենա Քրէչի հետ, որի ման-

կութիւնք եւ պատանեկութիւնն անցել են եկեղեցու շրջակայքում: Ըստ վերջինիս՝ եկեղեցու ողջ շրջակայքը 70ականներին պատուած է եղել գերեզմանաքարերով եւ Հնարաւոր չի եղել անգամ ազատ քայլել: Դժբախտաբար, Հայերի բացակայութեան, անուշադրութեան եւ բնական աղէտների պատճառով այսօր գերեզմանների մեծ մասն անհետացել է:

Սէյդաբաղի եկեղեցու շրջակայքում են թաղուած ժամանակի Համայնքալիները, հոգեւոր սպասաւորներ, վաճառականներ եւ ուրիշներ: Թաղուածների մեծամասնութիւնը տղամարդիկ են: Տապանաքարերի արձանագրութիւնները վկայում են, որ երբեմն այնտեղ թաղուած են այս կամ այն ընտանիքի բոլոր անդամները: Վերջին փաստը ցոյց է տալիս, որ ԺԸ. դարավերջ-ԺԹ. դարասկզբին Սէյդաբաղում Հայերն ունեցել են կազմակերպուած Համայնքային կեանք՝ Համախմբուած լինելով Հայոց եկեղեցու շուրջ: Ապագային թողնելով պահպանուած գերեզմանների տապանաքարերի ամբողջական վերծանումը՝ ստորեւ ներկայացնում ենք դրանցից ամենակարեւորները:

Սէյդաբաղի Ս. Աստուածածին եկեղեցու գաւթում է թաղուած Կալկաթալի Հայոց Մարդասիրական Ճեմարանի Հիմնադիրներից, ժամանակի նշանաւոր Հայ վաճառական Մնացական Վարդանեանը (1772-1827): Նա ծնուել է Նոր Զուղայում 1772 Մեպտեմբերի 6ին: Երիտասարդ Հասակում դաղթել է Հնդկաստան եւ Հաստատուել Սէյդաբաղ քաղաքում՝ զբաղուելով առեւտրական գործունէութեամբ: Անուրանալի է յատկապէս նրա բարոյական աջակցութիւնը Հայոց Մարդասիրական Ճեմարանի Հիմնադրման գործում: Փաստօրէն, նա իրականութիւն դարձրեց Ճեմարանի մէկ այլ Հիմնադրի՝ Աստուածատուր Մուրադխանեանի տեսիլքը՝ ունենալ կրթական Հաստատութիւն, ուր Հայ երեխաները կը ստանան ազգային կրթութիւն: Յետագայում նրա մասունքները տեղափոխուել են Կալկաթա եւ ամփոփուել Ս. Նազարէթ եկեղեցու գլխաւոր խորանի ետնամասում: Սակայն մեր Հետազօտութեան արդիւնքում պարզեցինք, որ եկեղեցական վարչութեան անդամները միայն նրա տապանաքարն են տեղափոխել, իսկ աճիւնը դեռեւս Հանգչում է Սէյդաբաղի Հայկական եկեղեցու բակում: Մեր տեսած՝ Հնդկաստանի Հայկական գերեզմանների մէջ Մնացական Վարդանեանի տապանաքարն ամենազեղեցիկն է, արուեստի իսկական մի գլուխգործոց: Գերեզմանաքարն այսօր տարբեր մասերից ջարդուած է՝ ծածկուած սպիտակ մարմարեայ տապանաքարով: Շրջանակի մէջ կանգնած վիճակում քանդակուած է ժամանակի տարագով նրա պատկերը՝ ձեռքին մէկ գիրք, որի չորս կողմում շրջանաձեւ գրուած է. «Մնացական Վարդան Սմբատեան, թիւն փոքր 212», այսինքն՝ 1827: Տապանաքարի վերելում տարբեր զարդաքանդակներ են, փողաւոր հրեշտակներ: Այն ունի 29 տողից բաղկացած չափածոյ մի արձանագրութիւն: Ամբողջական արձանագրութիւնը ժամանակին տպագրուել է Մարդասիրական Ճեմարանի 150ամեակին նուիրուած գրքում, այն մէջբերել է նաեւ Հայկազուն Սրբազանն իր օրագրութեան մէջ<sup>22</sup>: Սակայն այժի անցկացնելով տպագիրը, Սրբազան Հօր դուրս բերածը եւ Համեմատելով գերեզմանաքարի արձանագրութեան հետ՝ նկատեցինք որոշ սխալ ընթերցումներ եւ վրիպակներ, ուստի ստորեւ տալիս ենք արձանագրութիւնն ամբողջութեամբ: Յատկանշական է որ տապանաքարի վերջին տողի վրայ քանդակագործը նշել է իր անունը:

ԸՍՏ ԱՀԵՂ ՎՃՈՌՅ ԱՄԵՆԱԿԱԼԻՆ  
 ԲՆՈՒԹԻՒՆՍ ՀԱՄԱՅՆ ՆՈՅՆ ԲԱՆԻԻ ՓԱՅԼԻ  
 ՍՕՂՕՍՕՆԵԱՆՆ ԱՐԴԵՆ ԿԱՏԱՐԻ  
 ԹԷ ՀԱՆԳՈՅՆ ԵՄ ԵՒ ԵՍ ՄԱՀԿԱՆԱՑՈՒ  
 ՅԱՂԱԿԱՐԾՍ ՀԱՍԵԱԼ ԱՌ ՍԱ ՀՐԱՄԱՆ  
 ԱՅՆ ՎՃԻՌ ՄԱՀՈՒ ՈՐ ՏՈՒՄ ՄԱՐԳԿԱՆ  
 ՈՐՊԷՍ ՄԻ ՀՈՂՈՅ Ի ՆՄԱՆԷ ՍՏԵՂԾԱՆ  
 ՆՈՅՆՊԷՍ ԵՒ Ի ՆՈՅՆ ՀՈՂ ՎԵՐԱԴԱՌՆԱՆ  
 ԱՅՆ ԻՆՉ ՁԲԱԳԻՐ Ի ԳՈՐԾՍ ԱՇԽԱՐՀԻ  
 ԱՅՐ ՎԵՀԱՆՉՆ ԶԱԶ ԵՒ ՄԵԾԱՀՈԳԻ  
 ԱՆԴԵՆ ԱՌ ՆՄԻՆ ԸՆԴ ԱՆՏ ՏՈԳՈՐԻ  
 ՅԱՄԻՆ ԻՐ ԅԻՍՈՒՆ ԵՒ ՀԻՆԳԵՐՈՐԴԻ  
 ՉԻՄԱՀԱ ՀՐԱԻԵՐ ԱՆՏ ՎԱՂԺԱՄԱՆԵԱԼ  
 ԱՆԴԵՆ ԱՌ ՄԻՆ ԻՄՍ ՀԻՃԱՐԿԵԱԼ  
 ԹԷԵՒ ՍՊԵՂԱՆԻՔ ԲԱԶՈՒՄ ՅԱՃԱՆԵԱԼ  
 ԲԱՅՅ Ի ՉՈՐՍ ԱԻՈՒՐՍ ՉՍԱ ՓՈՂՈՏԵԱԼ  
 ԻՐ ԶԻ ԱՐԱԳ ԱՌ ՅԵՐԿԻՐ ԼՈՍԵԱԼ  
 Ի ԽՈՐ ԴԱՄԲԱՐԱՆ ԱՍՏԵՆ ԳԼՈՐԵԱԼ  
 ԹԷՊԷՏ ԱՌ ՎԱՅՐԻ ԽԱՄՐՈՒԹԻՒՆ ԼՈՒԾԵԱԼ  
 ԱՅԼ ԱՆԵՂԾԱԿԱՆ ԿՐԿԻՆ ՉԳԵՑԵԱԼ  
 ՅԱՆՈՒՆ ՄՆԱՅԱԿԱՆՆ ԱՅՐՍ ԱՅՍ ՊԱՏՈՒԻ  
 ՎԱՐԴԱՆ ՍՄԲԱՏԵԱՆՑ ՅԱՐՄԱՏՈՅ ԲՂՍԻ  
 Ի ՏԻՍ ՀԱՍԱԿԻ ԹՈՂԵԱԼ ՉԻՐ ՀԱՅՐԵՆԻ  
 ՈՐ Է ՆՈՐՆ ՉՈՒՂԱՅ ԳԱՅ ՉՀԵՏ ԻՐ ԲԱՆՏԻ  
 ԵՒ ԱՐԴ ՉԵՕԹՆ ՉԱԽԱԿՍ ԹՈՂԵԱԼ ՅԱՇԽԱՐՀԻ  
 Ի ՊԱՆԴԻՏՈՒԹԵԱՆ ՎԱՅՐԷՍ ՀՐԱԺԱՐԻ  
 Ի ՍԷԻՅՏԱՊԱՏ ՅԱՄԻ ՓՐԿՉԻ 1827-ԻՆ  
 ՀԱԶԱՐԻԱՅԻ ԱՍՍՈՅ ԹԻՐԱՅ 15-ԻՆ  
 ՏԱՊԱՆԱՔԱՐՍ ԶԱՆԴԱԿԵԱԼ ՏԵՐ ԿԱՐԱՊԵՏ ԳՐԻԳՈՐԵԱՆ,

*Սէյդաբաղուժ Մնացական Վարդանեանի կողքին է ամփոփուած նրա կողակից Եղիսարէթի մարմինը: Տաղանաքարի վերեւում քանդակուած է երկար մագերով մի կին, որի գլխավերեւում երկու կողմերից հատուժ են խնձորենու եւ տանձենու ճիւղերը:*

**ԵՂԻՍԱՐԵԹ**

ԺՐԱԳԼՈՒԻՆ ԿՈՂԱԿԻՑ ԵՒ ԱՐԺԱՆԻ ԱՄՈՒ  
 ՄԻՆ ՄՆԱՅԱԿԱՆ ՎԱՐԴԱՆԻ Յ33 ԱՄԻ ԴԵ  
 ՌԱՓԹԻԹ ՀԱՍԱԿԻ ԻՐՈՅ՝ ԹՈՂԵԱԼ  
 ՉՎՇՏԱԿԻՐ ԱՅՐ ԻՐ ԅՈՂԲՍ ԵՒ  
 ՉԵՕԹՆԵՔԻՆ ՊՏՈՒՂՍ ԱՐԳԱՆ  
 ԴԻ ԻՐՈՅ, ԱՅՄԻՆՔՆ 27 ՉԱԽԱԿՈՒՆՍ  
 ԻՐ ԅՈՐԲՍ: ՀԱՆԳԵԱՒ Ի ՏԵՐ ԵՒ  
 ՄԱՐՄԻՆ ՍՈՐԱՅ ԱՍՓՈՓԵՑԱԻ  
 ՅԱՅՍՄ ՏԱՊԱՆԻ Ի11 ԱՐԵԳ ԱՄ  
 ՍՈՅ ԿԱՄ 4 ԱԻԵԼԵԱՑ ԱՍՍՈՅ

ՅԱՄԻ ՏԵԱՌՆ 1816 Ի ՍԵՒԴԱՊԱՍ (Մարտի 19ին - Տ.Բ):

*Ս. Աստուածածին Եկեղեցու բակում են թաղուած նաև երեք հոգեւորականներ, ովքեր կա՛մ վիճակաւոր հոգեւորականներ են եղել, կա՛մ էլ Հայրապետական Նուիրակ: Եկեղեցու հարաւային դռան մօտ է Մինաս վարդապետի գերեզմանը, որի մէջտեղում քանդակուած է վարդապետական գաւազան: Գերեզմանաքարն ունի հետեւեալ արձանագրութիւնը.*

Ի ՇԻՐԻՄԻՍ ԱՍՏ ԱՄՓՈՓԻ  
ՍԱՐՄԻՆ ՈՒՄԵՆՆ ՍՐԲԱՅՍԻՐԻ:  
ՍԱՅ ՄԻԱԲԱՆ ԱՄԵՆԱՅՓՐԿՉԻ  
Ի ԸՍՊԱՀԱՆ ՇՕՇ ՔԱՂԱՔԻ:  
ՆՈՐ ՋՈՒՂԱՅՈՒ ՄԵՇԻ ՎԱՆԻ  
ԱՆՈՒՆՆ ՍՈՐԱ ՎԵՐԱՉԱՅՆԻ:  
ՐԱԲՐՈՒՆ ՄԻՆԱՍ ՎԱՐԴԱՊԵՏԻ  
ԵՒ ՔԱՐՈՉԻՉ ՀԱՄԱՅՆ ԱԶԳԻ:  
ՊԱՆԴԻՏԵՑԵԱԼ ՅԱՅՍՄ ԱՇԽԱՐՀԻ  
ՈՐ Ի ՀՆԴԻԿՍ ԱՅՍ ՔԱՂԱՔԻ:  
ԲԱԶՄԱՇԽԱՍ ՅՈՅԺ ՎՇՏԱԼԻ  
ՎԱՂՁԱՆ ԱՌԵԱԼ ԱՂԵՏԱԼԻ:  
ԱՄԱՅ ԳՈԼՈՎ ԵՕԹԱՆԱՄՆԻ  
Ի ՍԵՒԴԱՊԱՍ ԿԵԼՆՍ ՎՃԱՐԻ

ԹԻՎՆ 1803Ի, ՈՎԴԱՆ ԱՄՍՈՅ 15Ի, (Յունուարի 29ին - Տ.Բ):


*Տապանաքարի արձանագրութիւնից տեղեկանում ենք, որ Մինաս վարդապետը «վաղջան առեալ աղէտալի»։ Հաւանաբար այս արտայայտութիւնից պէտք է ենթադրել, որ նա մահացել է ինչ-որ հիւանդութիւնից, ամենայն հաւանականութեամբ՝ այն ժամանակ մահացու համարուող մալարիայից:*

*Վերոգրեալից քիչ ներքեւ Սուրբ Էջմիածնի նուիրակի գերեզմանն է։ Տապանաքարի մէջտեղում երկգլխանի օձազուլիս վարդապետական գաւազանն է, որի երկու կողմերում կարգում ենք հետեւեալ արձանագրութիւնը.*

ԱՅՍ Է ՏԱՊԱՆ ՍՐԲՈՅ ԷԶՄԻ  
ԱՇՆԻ ՆՈՒԻՐԱԿ ԵՓՐԵՄ ՊԵՏՐՈՍԻ  
ՏԵՐ ՍԱՀԱԿ ԱԲԵՂԱՅԻՆ:  
ՋՈՐ ԽՂՃԱԼԻ ՍԱՀՈՒԱ  
ՄԲ ԱՍՏԷՆ ՓՈՒԵՑԱԻ:  
ԱՌ ՔՐԻՍՏՈՍ ՅԱՄԻ ՏԵԱՌՆ  
1789 ՅԱՊՐԻԼԻ 7 Ի ՍԵ  
ՅԴԱՊԱՍՈՉՍ:

*Սէյդարադում է ամփոփուած նաև ոմն Մելքումի որդի Տէր Բաղդասարի մարմինը, որի տապանաքարն ունի հետեւեալ արձանագրութիւնը.*

ԱՅՍ Է ՏԱՊԱՆ ՍԵԼՔՈՒՄԻ ՈՐ  
ԳԻ ՀԱՆԳՈՒՅԵԱԼ ՏԵՐ ԲԱ  
ՂՎԱՍԱՐԻՆ, ՈՐ ՓՈՒԵՑԱԻ  
ՅԱՇԽԱՐԷՍ ԹԻՎՆ ՀԱՅ  
ՈՅ 1231, ԱԶԱՐԻ, ՀԱՄ  
ԻՐԱ ԻԱ, ՍԵՏԱՊԱՍ (1782 Դեկտեմբերի 6ին - Տ.Բ.):



ԼԻՏԱՆ ՎԱՊՈՒՍԱՆԻՅԻՆ ԽՈՍՏԱՆԿԱՆԱԿԱՆՈՒՄ



Էջմիածնի Նուիրակի տապանաքարը

Ուրախալի է, որ վերջին տարիներին Կալկաթայի եկեղեցական վարչութեան եւ Մարդասիրական Ճեմարանի պաշտօնէութեան ջանքերով տարբեր առիթներով ուխտագնացութիւններ են կատարուում Սէյդարադ եւ Ս. Աստուածածին եկեղեցի:

Սէյդարադի Հայոց եկեղեցին եւ Հայերին պատկանող ամբողջ տարածքն անլուռ վկաներն են երբեմնի բարգաւաճ Հայ Համայնքի, որտեղ գործել եւ արարել են Հայ նախնիք: Վերջին տարիների նպատակասլաց աշխատանքը յոյս է ներշնչում, որ Հնդկահայ Համայնքի այս գոհարը, անկախ Հայերի լինել-չլինելուց, դեռ երկար ժամանակ կանգուն կը մնայ, քանզի այն ոչ միայն Հայ մշակութային ժառանգութեան մէկ մասնիկն է, այլեւ իր պատմականութեամբ եւ նշանակութեամբ դարձել է նաեւ բազմակրօն եւ հին քաղաքակրթութիւն ունեցող Հնդկաստան երկրի պատմամշակութային հարուստ ժառանգութեան անբաժան մասը:

### ԾԱՆՕԹԱԳՐՈՒԹԻՒՆՆԵՐ

<sup>1</sup> Պատմական Բենգալիան վերջին երկու հազարամեակների ընթացքում եղել է տարբեր կայսրութիւնների եւ թագաւորութիւնների մաս: 1947ից յետոյ կրօնական առումով այն բաժանուեց երկու մասի. մուսուլմանական բնակչութեամբ մասն անցաւ Արեւելեան Պակիստանին, իսկ այնուհետեւ՝ Բանգլադէշին, իսկ միւս մասը մնաց աշխարհի Հնդկաստանի տարածքում: Արեւմտեան Բենգալիան Հնդկաստանի 28 նահանգներից է, որի պաշտօնական լեզուներն են՝ բենգալերէնը, հինդուն եւ անգլերէնը: Այս նահանգում են գործում Հայկական հինգ եկեղեցիները՝ Կալկաթայի Ս. Նազարէթ (1707), Ս. Գրիգոր Լուսաւորիչ (1906), Տինդրայի Ս. Երրորդութիւն (1867), Ջինսուրայի Ս. Յովհաննէս (1695-1697), Սէյդարադի Ս. Աստուածածին (1758), եւ 189ամեայ Կալկաթայի Հայոց Մարդասիրական Ճեմարանը:

<sup>2</sup> Այս մասին տե՛ս՝ Mesrovb J. Seth, "The Oldest Christian Tomb in Calcutta, Bengal Past & Present", *Journal of the Calcutta Historian Society*, January-June, 1932, էջ 27-9, Mesrovb Jakob Seth, *Armenians in India*, Calcutta, 1983, էջ 419. Տապանաքարի լուսանկարը եւ այլ մանրամասներ տե՛ս՝ Տիգրան սարկաւազ Բաղումեան, *Արեւմտեան Բենգալիայում թաղուած Հայ Հոգեւորականները*, Երեւան-Կալկաթա, 2007, էջ 13-5, 77:

<sup>3</sup> Կառավարող գերդաստան Հնդկաստանում՝ 1526-1857, Այն հիմնադրուել է թիմուրեանների առաջնորդ Բարուրի կողմից, երբ վերջինս յաղթում է Դելիի վերջին իշխան Իբրահիմ Լոդիին: Մուղալը (Mughal) մոնղոլ բառի պարսկերէն տարբերակն է: Այսպէս էին կոչուում Կենտրոնական Ասիայի այն թափառաշրջիկները, ովքեր իրենց Ջինգիզ Խանի յետնորդներ էին համարում: Մեծ է եղել մուղալ կայսրերի ազդեցութիւնը ժամանակի արուեստի եւ ճարտարապետութեան վրայ: Մուղալ կայսր Շահ Ջահանի օրօք կառուցուել է աշխարհի հրաշալիքներից մէկը՝ Թաջ Մահալը:

<sup>4</sup> Մուղալ կառավարիչների վարած հեռատես քաղաքականութեան հետեւանքով Հայերը Հաստատուեցին Հնդկաստանի զանազան քաղաքներում: Նրանք ոչ միայն զբաղուում էին առևտրական գործունէութեամբ, այլեւ կառուցում շինութիւններ, հիմնում աշխատատեղեր, բարեգործական, կրթական եւ այլ Հաստատութիւններ՝ դրանով իսկ նպաստելով նաեւ երկրի տնտեսական զարգացմանն ու փողովորդի բարօրութեանը: Հայերի մէջ կային նշանաւոր դիւանադէտներ, իրաւաբաններ, բժիշկներ, մշակոյթի գործիչներ, ովքեր նպաստեցին Հնդկաստանի զանազան բնագաւառների զարգացմանը: Իսկ Խոջա Փանոս Քալանթարի հետ կերուած պայմանագրով Հայերն անգլիացի վաճառականների նման նոյն իրաւունքներն ստացան: Նրանք ազատ ելումուտի ի-

բաւուճք ունէին անգլիական բոլոր առեւտրական կենտրոններում, կարող էին ապրել ընկերութեանը պատկանող քաղաքներում եւ այլ վայրերում, դառնալ սեփականատէր, իրենց կրօնական զգացմունքները բաւարարելու համար եկեղեցիներ շինել, առեւտրական բեռներն առանց մարտի տեղափոխել անգլիական նաւերով, եւն. (Seth, էջ 231-244, Վահան Բաջուրդեան, Համալսարանային Առեւտուրը Եւ Իրանահայութիւնը 17րդ Դարում, Թեհրան, 1968, էջ 221-223. նաեւ՝ Ա. Գ. Արրահամեան, Համառօտ Ուրուագիծ Հայ Գաղթագիրների Պատմութեան, Հար. Ա., Երեւան, Հայպետհրատ, 1964, էջ 457-460. նաեւ՝ Լէօ, «Հայկական Տպագրութիւն», Երկերի Ժողովածու, Հինգերորդ Հատոր, «Հայաստան» Հրատ., Երեւան, 1986, 512. նաեւ՝ Արշակ Ալոյսաճեան, Պատմութիւն Հայ Գաղթականութեան, Հայերու Երուումը Աշխարհի Զանգան Մասերը. Գ. Նոր Դարու Սկիզբէն Մինչև Ի. Դարու Սկիզբը. Ա. Մաս Արեւելեան Գաղութներ, Հար. Գ., Գահիրէ, 1961, էջ 320-323, 337-361):

<sup>5</sup> Երբ 1690ականներին անգլիացիները հաստատուեցին Կալկաթայում, նրանք ցանկանում էին գործակալատուն եւ մեծ ամրոց շինել՝ ապրանքներն ապահով պահելու համար: Բայց դրա համար անհրաժեշտ էին հողակտորներ եւ ամենակարեւորը՝ մուղալ կայսեր արտօնութիւնը: Անգլիացիները քաջ գիտակցում էին, որ մուղալի կառավարիչների մօտ իրենց համար կարող են բարեխօսել եւ միջնորդներ լինել միայն Հայերը, ովքեր տարիների աշխատասիրութեան եւ հաւատարմութեան շնորհիւ վայելում էին տեղի կառավարիչների համակրանքն ու յարգանքը: Ուստի ընտրութիւնը կանգնում է Խոջա Իսրայէլ Սարհադի վրայ: 1698ին վերջինիս եւ արքայազն Ազիմ-ուլ-Խանի միջեւ բանակցութիւններով անգլիացիներին է վերապահոււմ Կալկաթայի երեք գիւղերի վարձակալման իրաւունքը: Յետագայում նույն այս վաճառական հայն իբրեւ պատգամաւոր 1715ին Դելի գնաց եւ անգլիացիների համար կարողացաւ ձեռք բերել «Մեծ Փարմանը», որով Հնդկաստանի մէջ փաստօրէն հիմնադրուեց Բրիտանական կառավարութիւնը (Մետրոյք Ե. Սէթեանց, «Հայերն Իրր Գաղաքական Ոտից Կայան Հնդկաստանի Մէջ. Խոջա Իսրայէլ Սարհադ», Բազմալէզ, Հար. ՂԵ., 1937, թիւ 1, էջ 68-72. նաեւ՝ Տիգրան օսրկաւազ Բաղումեան, «Նշանաւոր Հայ Վաճառականն Ու Դիւանագէտը. Խոջա Իսրայէլ Սարհադ», Ազդարար, թիւ 6, 2009, էջ 28-29):

<sup>6</sup> Կալկաթայի Հայոց Մարդասիրական Ճեմարանը հիմնադրուել է 1821ի Ապրիլի 2ին ջուղայեցի բարերարներ Աստուածատուր Մուրադխանեանի տեսիլքով եւ Մնացական Վարդանեանի անմիջական նախաձեռնութեամբ: Նրանց նպատակն էր հայեցի եւ ազգային կրթութեամբ ապահովել հնդկահայ գաղութի զաւակներին: Ճեմարանն իր պատմութեան ընթացքում գաղութի կեանքի նման ունեցել է վերելքի եւ անկման շրջաններ: Տարբեր շրջաններում այստեղ են դասաւանդել նշանաւոր հայորդիներ Յովհաննէս Աղաճուրեանցը, Յարութիւն Գալուցեանը, Մետրոյք Սրկ. Թաղիադեանը, Յովհաննէս Աւդալեանը եւ Ասատուր Կիւզէլեանը: Ճեմարանի սկանաւոր սաներից են ԺԹ. դարի հայագէտ Մկրտիչ Էմինը, Թաղէոս Աւետուճեանը, Յարութիւն Տէր-Յովհաննեանցը, Մետրոյ Աէթը, Երուսաղէմի Հայոց Պատրիարք Կիւրեղ Բ. Իսրայէլեանը, Տ. Ներսէս Ա. Քհնյ. Ներսիսեանը եւ ուրիշներ: 1953ին Ճեմարանին է միանում Դաւթեան Օրիորդաց Վարժարանը: 1980ականներին աշակերտներ չլինելու պատճառով Ճեմարանը կանգնած էր փակման վտանգի առաջ: Կալկաթահայերի եւ նախկին Ճեմարանականների նախաձեռնութեամբ եւ Արեւմտեան Բենգալիայի Բարձրագոյն Դատարանի որոշմամբ 1999ին Ճեմարանը յանձնոււմ է Մայր Աթոռ Սուրբ Էջմիածնի տնօրինութեանը: Վեհափառ Հայրապետի տնօրինութեամբ վերջին շրջանում բազմաթիւ փոփոխութիւններ են կատարուել այնտեղ. բարձրացել է կրթական մակարդակը, բարելաւուել են սաների կենցաղային պայմանները եւ Ճեմարանը վերագտել է իր երբեմնի ազգային նկարագիրը: Այսօր այնտեղ ուսանում են շուրջ 80 սաներ՝ Իրանից, Հայաստանից եւ Իրաքից (Ճեմարանի մասին տե՛ս՝ Զ. Գ. Հանանեան,

Կալկաթայի Հայոց Մարզախրական Ճեմարանը 1821-1971, Թեհրան, Տղարան «Ալիք», 1971, էջ 9-96)։

<sup>7</sup> Վերջին 5 տարիներին Ամենայն Հայոց Կաթողիկոսի տնօրինութեամբ եւ Կալկաթայի եկեղեցական Վարչութեան նախաձեռնութեամբ վերանորոգուել են Կալկաթայի Ս. Գրիգոր Լուսավորիչ եկեղեցին եւ Հայկական ծերանոցը, հիմնովին վերանորոգուել են Տինգրայի Ս. Երրորդութիւն եկեղեցին, բարեկարգուել է եկեղեցու տարածքը, կառուցուել է «Փարեգին Բ. Վեհափառ»ի անուան բժշկական կենտրոնը։ Այս ընթացքում վերանորոգուել են Սէյդարաղի եւ Մաղրասի Ս. Աստուածածին Հայկական եկեղեցիները, Կալկաթայի Հայկական սկումբր եւ Հայոց Մարզախրական Ճեմարանի վարչական շէնքերը։ Յատուկ ուշադրութիւն է դարձուել նաեւ փոքրաթիւ հայերի ընկերային-տնտեսական պայմանների բարելաւմանը։

<sup>8</sup> Մուրշիդարաղը Բենդալիայի ամենահին քաղաքներից է՝ անկախ կառավարիչների վերջին մայրաքաղաքը եւ բրիտանացիների տիրապետութեան ժամանակ՝ առաջինը 1704ին Մուրշիդ Կալիա խանի կառավարութիւնը Գաքթայից տեղափոխուում է Մաքսուդարաղ՝ վերջինիս առում իր անունը։ Մուրշիդարաղ քաղաքը Գանդէսի վտակ Բհագիրաթի Հարաւային գետափի վրայ է, Ինչպէս ԺԸ-ԺԹ դարերում, այնպէս էլ այսօր այն մետաքսի արտահանման մեծ կենտրոն է, ունի նաեւ զարգացած զիւզանտեսութիւն։ Այսօր մեծաւ մասամբ քաղաքի բնակիչները մուսուլմաններ են եւ հինդուներ։

<sup>9</sup> Աուրանդէրը կամ Ալամգիր Ա-ն (ամբողջական անունը՝ Արու Մուզաֆֆար Մուհի-ուդդին Մուհամմադ Աուրանդէր Ալամգիր) Մուղալ կայսրութեան վեցերորդ կառավարիչն է՝ Շահ Ջահան կայսեր երրորդ որդին, ով 48 տարիներ կառավարեց Հինդուստանը։ Նա շատ կրօնամուտ էր՝ հաւատարիմ իսլամական օրէնքներին։ Նրա կառավարութեան օրօք բազմաթիւ հնդկական տաճարներ քանդուեցին եւ եղծուեցին, ոչ-մուսուլմաններին պարտադրուեց իսլամական կրօնը։ Ազդուելով մուսուլմանական օրէնքներից՝ Աուրանդէրն արգելեց արքունիքում երաժշտութիւնը, աքսորեց բազմաթիւ երաժիշտների, պարողների եւ երգիչների, երկրում դադարեցրեց ծաղկում ապրող մանրանկարչութիւնը, որոնք էլ բազմաթիւ խռովութիւնների պատճառ դարձան։ Նա իր երեխաներից շատերին եւ նրանց կանանց աքսորեց եւ բանտարկեց՝ իր կեանքի մայրամուտին մնալով միայնակ։ Մահացել է 1707ին Ահմէդնագարում՝ 90 տարեկան հասակում։

<sup>10</sup> Աբրահամեան, էջ 448-449. նաեւ՝ Anne Basil, *Armenian Settlements in India*, Calcutta, 1969, էջ 34. նաեւ՝ Seth, էջ 325.

<sup>11</sup> Վկայութիւնը մէջբերել է Սէթն իր աշխատութեան մէջ, տե՛ս՝ Seth, էջ 325.

<sup>12</sup> Այս մասին տե՛ս՝ Թոմաս Խօջամալիան, *Նոր Զուգայեցոյ Պատմութիւն Հնդկաց, Մասն Երկրորդ, Կալկաթա, Տպ. Ազգասէր Արարատեան, 1849, էջ 141-148. նաեւ՝ Ալպոյանեան, էջ 299-300.*

<sup>13</sup> Աբրարի վարած այս իմաստուն քաղաքականութեան շնորհիւ հայերը մնայուն կայք հաստատեցին Ազրայի շրջակայքում եւ 1582ին կառուցեցին Հայկական եկեղեցի, որ կանդուն էր մինչեւ ԺԹ դարը։ Հայերի ներկայութեան մասին է վկայում նաեւ Ազրայի Հայկական գերեզմանատունը։ Այս մասին տե՛ս՝ Աբրահամեան, էջ 447-8. նաեւ՝ Ալպոյանեան, էջ 299-301. նաեւ՝ Բայբուրդեան, էջ 195. նաեւ՝ Seth, էջ 2-3, 120-34.

<sup>14</sup> Նշանաւոր այս հայ վաճառականին Յոզէֆ Էմինը 1792ին Լոնդոնում տպագրուած *Յոզէֆ Էմինի Հայի կեանքն Ու Արկածները ինքնակենսագրական աշխատութեան մէջ անուանում է «կալկաթահայերի երկրային աստուած», որն էլ իստուն վկայութիւնն է այն խորը յարգանքի, որ Խոջա Պետրոսն ունեցել է հնդկահայ զաղութում (Amy Aparcar (ed.), *Life and Adventures of Emin Joseph Emin 1726-1809 Written by Himself*, 2<sup>nd</sup>*

edition, Calcutta, 1918, էջ 435. նաև՝ *Խօջամալեան*, էջ 50-75. նաև՝ Seth, էջ 343-56):  
*Խոջա Պետրոսի տապանաքարի արձանագրութիւնը տե՛ս՝ Բաղումեան*, էջ 8-9:

<sup>15</sup> *Մայր Աթոռ Սուրբ Էջմիածնի ձեռագրատուն*, ձեռ. N 631, Թ. 207ա: Սրբազանի մէջ-  
բերած եկեղեցու արձանագրութեան որոշ հատուածներ ուղղել ենք՝ այն համեմա-  
տելով 1963ին կալկաթայում լոյս տեսած գրքոյկի մէջ զետեղուած արձանագրու-  
թեան լուսանկարի հետ (*A Short History of the Armenian Apostolic Church of Holy  
Virgin Mary* (Saidabad, West Bengal), Calcutta, 1963, էջ 20):

<sup>16</sup> Գրիգոր Յարութիւնեանը, Հնդկական աղբիւրներում յայտնի է Գորգին Խան անու-  
նով: Նա բնագալական բանակի հրամանատար է նշանակուել Բենգալիայի իշխան Միր  
Կասիմի կողմից՝ յամառ պայքար մղելով անգլիացի գաղութարարների դէմ: Նրա ա-  
ռաջնորդութեամբ Հնդկական բանակը բազում յաղթանակներ է տարել անգլիացիներ  
դէմ: Վերջիններս անգամ փորձել են կաշառել նրան, բայց հայ զորավարն անպատ-  
ուարեր է համարել ուխտադրուծ լինելը եւ մերժել նման առաջարկները: Նա գործօն  
մասնակցութիւն է ունեցել 1762-63ի Հնդիկ-անգլիական կռիւներին: Մահացել է 1763  
Օդոստոսի Սին դաւնայով դաւադրութեան զոհ (Խօջամալեան, էջ 82-123. նաև՝  
*Աբրահամեան*, էջ 464-9. նաև՝ *Լէօ*, էջ 518-9. նաև՝ *Ալպոյաճեան*, էջ 340-1, 344-5.  
նաև՝ Seth, էջ 384-418):

<sup>17</sup> *Բաղումեան*, էջ 9:

<sup>18</sup> Մատթէոս կարապետեանի մասին այս զրոյցները մեզ պատմել են ամերիկաբնակ նրա  
դուստրը՝ Լուսի Ալվազեանը եւ այժմ Սէյդարազում ապրող տարեցները: Մենք մի  
քանի անգամ այցելել ենք հրրեմնի հայաշատ այս քաղաքը եւ ամէն անգամ հպար-  
տութիւն ապրել՝ տեղի բնակիչներից զանազան հետաքրքրական պատմութիւններ  
լսելով Սէյդարազի Ս. Աստուածածին եկեղեցու վերջին խնամակալների մասին:

<sup>19</sup> *Բաղումեան*, էջ 10-11. նաև՝ *Էջմիածին*, ԺԲ, 2006, էջ 124:

<sup>20</sup> *Ամրող Նրկեր Տ. Թորգոմ Պատրիարք Գուշակեանի, Զ., Հնդկահայք, Տպաւորու-  
թիւններ եւ Տեղեկութիւններ (Պատկերազարդ)*, Երուսաղէմ, Տպ. Ս. Յակոբեանց,  
1941, Գուրեան Մատենադարան, Թիւ. 21, էջ 170:

<sup>21</sup> A. Caro Martin, *The Armenian Community in India, Its Churches and Affairs*, Calcutta,  
1958, էջ 41:

<sup>22</sup> *Armenian College Old Boy's Union Souvenir, Golden Jubilee, 1909-1959*, Calcutta, 1965,  
էջ 5. նաև՝ *Մայր Աթոռ Սուրբ Էջմիածնի Ձեռագրատուն*, ձեռ. N 631, էջ 206-207:

---

THE ARMENIAN CHURCH OF SEYDABAD AND  
SOME OF ITS FAMOUS TOMBSTONES  
(Summary)

TIGRAN BAGHUMIAN  
tigransrk@yahoo.com

The State of Bengal has had a unique meaning in the life of Armenians in India, who started to live there in the early 17<sup>th</sup> century before the British. By the mid-18<sup>th</sup> century, Armenians had become a very active merchant community in Bengal. At first they settled at Saidabad, a suburb of Murshidabad, and in 1665, by virtue of a royal Farman issued by Mughal emperor Aurangzeb (1658-1707), they were granted a plot of land and were permitted to form a settlement.

In 1758 the Armenians built a church dedicated to St. Mary with money donated by Khoja Petros Arrathoon, a famous Armenian merchant and benefactor of the time.

The author reflects on the history of the Armenian Church and community of Saidabad, on the Armenian cemetery and quotes the lost inscription of the founding of the Church.

The author notes that Armenian tradesmen, clergymen and representatives of the community are buried in the Saidabad Church cemetery. The inscriptions of the gravestones of Mnatsakan Vardan, one of the founders of the *Hayots Martasiragan Djemaran*, of his wife Elizabeth and of three clergymen buried there are particularly mentioned.

The article gives an account of the last caretakers of this Armenian Church, Matheos and Mary Carapiet, and their generous activities to preserve the church and the Armenian spirit as well as the legendary stories told about Matheos by the locals.